

ANCAMAN KORONAVIRUS DI CHINA



Boleh bertahan empat bulan sahaja

Ada pengusaha hotel mendakwa telah kerugian RM200,000 sejak sebulan lalu

Oleh HASNIZA HUSSAIN

SHAH ALAM

Penularan wabak koronavirus telah memberikan impak kepada ekonomi Malaysia khususnya terhadap industri pelancongan negara sehingga mengakibatkan kerugian besar.

Menurut satu sumber industri perhotelan yang enggan dinamakan, pihaknya terpaksa melakukan usaha penjimatan kos bagi membolehkan perniagaan mereka mampu bertahan dalam tempoh empat bulan lagi.

Antara langkah-langkah drastik yang telah diambil adalah dengan mengurangkan pekerja termasuk mengecilkan operasi menerusi penu-



Pelancong asing mengambil langkah berjaga-jaga dengan memakai topeng muka ketika berkunjung ke Malaysia.

tupan bilik-bilik hotel serta pendingin hawa.

“Apa yang berlaku kini bukan sahaja pelancong asing terutama dari China telah membatakan tempahan mereka malah ramai pelancong tempatan juga tidak lagi membuat tempahan hotel.

“Penularan wabak ini turut memberi kesan besar kepada perniagaan lain seperti kereta sewa, agensi pelancongan dan juga pusat-pusat pelancongan tempatan,” katanya ketika dihubungi *Sinar Harian* semalam.

Sumber itu memberitahu: “Hotel yang saya urus telah hilang perolehan pendapatan RM200,000 sejak bulan Januari lalu.”

Dalam pada itu, Timbalan Dekan Pengajian Siswazah dan Antarabangsa Fakulti Ekonomi dan Pengurusan Universiti Putra Malaysia (UPM), Prof Madya Dr Yuhanis Ab Aziz berkata, wabak koronavirus adalah satu senario global dan impak tersebut dilihat akan menjesaskan industri pelancongan terutamanya bagi suku pertama tahun ini.

Menurutnya, dalam tempoh hampir dua bulan wabak koronavirus melanda Malaysia, jumlah pelancong yang masuk ke negara ini dilihat semakin berkurang malah banyak tempahan hotel untuk persidangan dan mesyuarat dibatalkan.

“Pelancong menjadi sangat berhati-hati dan tidak mahu datang ke Malaysia. Apabila pelancong tidak datang, pendapatan negara akan terjejas terutama

dari segi pertukaran mata wang asing yang masuk, pendapatan yang diperoleh daripada penginapan dan restoran termasuk perbelanjaan yang sepatutnya mereka lakukan di sini,” katanya.

Beliau berkata, dalam konteks perniagaan lain, pengurusan rantaian bekalan di hotel juga turut menerima kesan kerana banyak makanan mentah serta makanan dalam tin diimport dari luar negara termasuk China.

“Ia akan mengganggu proses penyediaan makanan serta operasi perniagaan restoran lain dan kemudiannya menyebabkan kos menjadi semakin mahal kerana wujud ketidakpastian dalam pengendalian perniagaan,” katanya.

Ketika ditanya sama ada keadaan ekonomi terjejas itu akan berterusan dalam tempoh beberapa bulan akan datang, Yuhanis berkata, suasana itu mungkin akan berterusan tetapi bukan dalam jangka masa panjang.

“Saya optimis keadaan akan semakin baik menjelang pertengahan tahun ini kerana kesedaran dalam kalangan rakyat terhadap wabak ini dilihat semakin meningkat di mana mereka tidak keluar ke tempat awam bila tidak perlu, memakai topeng dan mengamalkan penjagaan kebersihan yang baik,” katanya.

Sementara itu, Prof Madya Dr Ahmed Razman Abdul

Latiff daripada Putra Business School (PBS) turut senada dengan Yuhanis dan memberitahu, wabak tersebut memang memberi impak ketara kepada ekonomi negara, namun beliau percaya keadaan itu akan pulih dalam tempoh beberapa bulan lagi.

Menurutnya, penularan wabak itu baru berlaku dalam tempoh dua bulan dan masih belum dapat mengukur sejauh mana kesannya terhadap ekonomi terutamanya industri pelancongan negara.

“Tetapi itu tidak bermakna kita perlu menunggu data atau statistik keluar, baru hendak mengambil tindakan menangannya. Kerajaan boleh mengambil pendekatan awal seperti dilakukan China yang dilihat menyuntik dana sebanyak RM91 bilion ke dalam pasaran bagi memastikan ekonomi domestik mereka terus berjalan.

“Di Malaysiaumpamanya kerajaan boleh melakukan perkara sama dengan menyuntik dana kepada industri yang terjejas seperti pelancongan dengan memberi kemudahan pembiayaan kewangan melalui agensi tertentu bagi membolehkan mereka terus berdaya saing.

“Bantuan ini sekurang-kurangnya dapat membantu mereka untuk terus hidup sementara menunggu ekonomi kembali pulih,” katanya.



AHMED RAZMAN



YUHANIS